

(237^b). **Epidendrum hexapterum** Cogn. (n. sp., sect. *Encyclium* § *Holochila*): pseudobulbis aggregatis, breviusculis, linearibus, valde compressis, superne non vel vix incrassatis, apice diphyllis vel rarius 1-phyllis, vaginis 2 — 3 majusculis vestitis; foliis satis coriaceis, lineari-ligulatis, apice obtusis et suboblique emarginatis, basi satis angustatis, margine minute denseque cartilagineo-denticulatis; pedunculo satis gracili, valde compresso et distincte bialato, 1-floro, foliis aequilongo vel paulo brevior, vaginis 2 majusculis obtusisque vestito, apice 1-bracteato; bractea magna, coriacea, ovato-oblonga, obtusa; flore majusculo, erecto, segmentis tenuiter membranaceis; ovario distincte 6-alato; sepalis obovatis, subtiliter multinervulosis, dorsali apice retuso, lateralibus paulo longioribus, obtusis; petalis obovatis, apice rotundato-subretusis, sepalis lateralibus aequilongis; labello sepalis multo brevior, late cuneato-obovato, indiviso, apice rotundato, margine superne valde undulato-crispo, disco superne sparse minuteque verruculoso; columna libera, gracillima, apice latiuscule bialata.

Pseudobulbi erecti vel ascendentes, leviter arcuati, 2 — 3 cm. longi, 1 — 1½ mm. crassi; vaginis membranaceis, adpressis, obtusis, pallidis et dense fusco-verruculosis, 1 — 1½ cm. longis. Folia erecto-patula, rigidiuscula, plana, laete viridia, 3 — 6 cm. longa, 4 — 7 mm. lata; nervo mediano supra vix canaliculato, subtus satis prominente; nervulis lateralibus numerosis, in sicco utrinque prominentibus. Pedunculus erectus, strictus vel paulo arcuatus, 2 — 5 cm. longus; vaginae submembranaceae, adpressae, pallide virides et fusco-punctatae, 7 — 10 mm. longae. Bractea subcoriacea, arcte adpressa, inferne amplexicaulis, 9 — 12 mm. longa. Flores intense rubri, in sicco flavi. Sepala subplana, 13 mm. lata, dorsale 16 mm. longum, lateralia satis obliqua, 18 mm. longa. Petala paulo obliqua, basi valde angustata, 18 mm. longa, 13 mm. lata. Labellum erectum, columnam amplexans, 7 mm. longum, superne 5 mm. latum. Columna subrecta, antice canaliculata, 5½ — 6 mm. longa, alis anticis, rotundatis, membranaceis. Capsula stricta, recta, anguste oblongo-fusiformis, latiuscule 6-alata, 18 — 20 mm. longa.

Hab. in Sto. Domingo prov. Barahona in cacumine Noche Buena, alt. 1800 m., flor. et fruct. m. Sept.: M. Fuertes n. 981.